

110 年全國語文競賽客家語朗讀文章國小學生組（大埔腔）

編號 2 號

【鬧熱个落雨天】曾菁怡原作

鬧鐘鈴鈴鈴響咧！大嫲聲喊佢遽遽趺床，過勒床斯會赴毋掣去學校讀書哩啲。佢目西西伸手搵撇鬧鐘，過橫落軟習習个眠床頂，毋盼得同佢分開。咦！毋係天光咧？外背仰脣還係暗摸脣疏？探頭看出去，原來係天公派烏雲使者來通知吾等——愛落雨咧！

有人認為落雨天已麻煩，出門愛著水衣，無斯擊遮，無細義衫褲又會淋去溼漉漉，去哪位都無方便。學生盡惱無法度出去打球、搞寮，一下課先生斯掌緊，麼人都使毋得出去逐雨，所以見看啊著落雨，大家斯唉唉嚟嚟，眼盯盯看雨水占領歸個運動埕，實在還愠悴哦！

毋過，落雨天對佢來講嗰係已鬧熱个日。朝脣一出門，街路做下塞滄滄个車，這片嘩嘩；該片叭叭，像久無見面个朋友相賽招呼，大家尖共下講起久無見面个思念。該兜行路个人，擎緊一支一支各色个遮花，雨水一滋潤，斯開出五彩个花蕾，行來行去像在比麼人个花較靚。你係聽較真兜，該雨水落在車頂、屋頂、水窟抑係樹葉个聲音做下無共樣，有高，有低；有大聲，有細

聲，像唱歌分你聽个樣。成半下，雷公還會用曠燼打燈光，用響雷伴奏，你講，係毋係已生趣？

佢盡好在落雨天打早去學校，因為該兜平常時固核核个蝓螺、蟲蟻全部都會出來搞水。學校牆頭係膏水泥个，泥壁頂个溜苔青里里，落雨該下，蝓螺趟上趟落陣打陣，有兜比賽看哪隻趟較遽，有兜彎來幹去做畫圖个藝術家，有兜停在牆頭面享受逐雨个清涼，逍遙自在。

落雨天出來搞寮个蟲蟻盡好膽，衫褲無著斯緊拚拚走出來搞水，溝壩肚浪浪滾个水流已刺激，幾尾蟲蟻分水冲過去還會扭來扭去，暢都奈毋得。有个蟲蟻大犍犍趟到路頂來，較砸身个還使得趟倒轉去；較媿个將就橫在路徑頭，分天公做主咧！

鬧熱个落雨天，有人懊惱，有人歡喜，天公無法度分逐個人納意，孤孤偲自家改變想法，不管麼个天都係當好个天。